

國

朝

列

卿

紀

國朝列卿紀卷之四十八

兵部尚書行實

劉大夏字時雍湖廣岳州府華容縣人天順甲申

士初內閣李文達彭文憲二公欲畱官翰林大夏與安福張敷  
華力辭不就識者已知其有經世之志初補兵部主事卽厭章  
句於疆場之事多所討論覈堅弱究虛實審形察勢以自考鏡  
及歷員外郎晉職方司郎中益侃侃自樹不與世降趨時朝  
廷好寶玩中貴有希迎者言宣德間遣王三保出使西洋等番  
所獲奇珍異貨無筭上然之命中貴至兵部查三保至西洋  
水程尚書項忠使都吏於庫中檢舊案大夏先入檢得之故匿

其籍都吏檢之不得數被捶若弗聞者會科道連章諫其事遂寢後項呼都吏曰庫中案卷安得失去大夏徐以利害告之曰三保大監下西洋時所費錢糧數千萬軍民死者亦萬計縱得珍寶國家何益此一時弊事太臣所當切諫者案雖在亦當毀之以拔其根尚足追究其有無哉項齎然降位再揖而謝之指其位曰公陰德不小此位不久當屬公矣朝鮮使者爲建州虜邀劫請改貢道中官有朝鮮人爲之地事下兵部議將從之大夏曰朝鮮貢自鴨鵝關由遼陽歷廣寧過前屯而後入山海迂迴四三大鎮此祖宗微意今若自鴨綠抵前屯山海路太徑恐貽他日憂卒不從又北虜數寇雲中邊帥失利中外震驚調

發戰守無虛日每報至尚書必曰劉郎中云何所言輒行行之  
輒效時右侍郎缺中官有欲薦之者遣人言於尚書真一往見  
大夏與詞討之然猶促迫不已乃自求外補尋出爲福建叅政  
初郎中秩滿三載朝中諸老欲以太僕處之大夏知其故私語  
所知曰郎中轉京官固人所欲但吾做秀才時見府縣政事不  
得其平輒曰使我做時某事當如何行某事當如何罷今幸登  
朝不得一親民官非素志也况郎中一出非知府則叅議官階  
崇重何爲而不可但恐人負官耳吏部不能奪抵福建奉勅  
巡海海道兵久弛而倉儲久耗卒難就理大夏曰在得人耳謀  
於鎮巡首選衛所軍政官而擇其尤者總諸水寨兵造戰哨船

各若干艘緩急異用葺倉計儲立收支法寨設一館而親督察之不半年海道肅然弘治三年陞廣東右布政時監督諸軍平後山賊軍人俘賊屬數中有一女子儀容閒雅步止羞澁呼問乃潮州士人家女被賊虜去長欲收爲妾蠻婦妬忌育以爲女也大夏惻然與閑閑在一室令二老婦守之統軍都指揮王永意其欲得之給與衣裳鉛粉又半月出視光彩動人大夏問其所願欲答曰願回本鄉大夏曰回鄉須差軍護送千里之程豈勝汗辱乎乃擇里長兒某者嫁之且以數牛賜其家耕作嘗過崖山吊大忠祠念宋慈元后陵寢無主輒泣然曰后與陸張二臣同死國今大忠有祠而慈元不祀於義弗稱謀於白沙陳公

甫爲之立廟人感其義不日而就踰二年轉浙江左布政會河  
決張秋擢右副都御史治焉旣至乃集山東河南二省守臣議  
以事關運道莫敢適主大夏曰河性猛悍張秋乃下流喉襟未  
可輒治治於上流分道南行復築長堤以禦橫波且防大名山  
東之患俟其循軌而後決可塞也遂疏孫家渡河三十里四府  
營河十里築長堤起河南胙城盡徐州經滑長垣東明曹單諸  
縣長三百六十里量能任功五旬而事竣尋進左副都御史理  
院事歷戶部左侍郎弘治丁巳宣大倉場糧草告乏特命兼  
左僉都御史總督軍餉瀕行周司徒經謂曰邊上糧草半屬京  
中貴人子弟經營公素不與此輩合此行所謂剛取禍矣大夏

曰處天下事以理不以勢定天下事在近不在遠俟至彼圖之  
至召邊上父老日夕講究遂得其要領一日揭榜通衢云某倉  
缺糧幾千石某場缺草幾萬束每石每束給官價若干封圻內  
外官員客商之家但願告報者米自十石以上草自百束以上  
俱准告雖中貴子弟不禁也不兩月倉場積蓄有餘蓋徃時糴  
買法有來告糧百千石者草千萬束者方准以致中貴子弟各  
爭相爲市乃轉買邊上軍民糧草陸續運至自此法立有糧草  
之家自往告報中貴家人卽欲收糴無處得買也迄今軍民云  
自劉公收市法行倉場有餘積私家有餘財三十年前僅覩此  
耳踰年上章乞致仕 孝皇特旨令馳驛歸養病病痊起用歸

家踪跡不出里閭入官所得俸資每贖族人之貧匱者庚申進  
右都御史總督兩廣軍務勅使臨門卽携二僮以行兩廣人  
士聞其來如饑兒之得乳母旌賢才斥貪穢裁冗費更役法上  
下不便者一切正之廣人駸駸樂生矣十四年辛酉土官黃理  
殺嫡謀襲大夏捕理誅之上思州土人黃金因督府徵兵違期  
州吏目黃文通促之不發乃火其營金怒攻州治焚文通家掠  
民貲大夏捕誅之壬戌召陞兵部尚書大夏代文升掌本兵提  
督團營操練遂以安內攘外爲已任申飭將吏昭示紀綱每於  
利害可否之際侃侃不容中默十六年癸亥四方奏災異畿甸  
四五月無雨遂引咎求退且言兵政弊端上不允令開具弊



端卽陳十事一曰京住官軍苦於出錢供用二曰在營軍士困  
於私役做工三曰江南軍士因漕運破家四曰江北軍士因京  
營失業五曰竭軍民之力運糧而濫食者衆六曰罄生民之財  
買馬而私用者不顧法禁七曰各處鎮守大監貪濫八曰各處  
守備內臣占軍數多九曰陞賞被於勢要十曰禁衛苞苴公行  
奏上 孝宗一一准行之自是委任益隆思所以重用之矣十  
七年甲子北邊總兵員缺李某者求婿近戚以情干於上欲  
傳奉得之 上曰傳奉先朝弊政朕始革罷豈可復踵其人懇  
請 上命司禮監與兵部議李榮對曰有 旨傳奉尚書劉某  
且執奏中官口傳之詞彼豈聽受耶其人懇不已 上曰奉

天早朝退獨召大夏授一帖子啓視之乃硃書某人姓名也退至部語同列曰上旣令兵部推舉只當以堪任者聞如某人才望非帥臣選終不可從明日推某某以請上徑從內批出用李某其人到未久被劾取回他日大夏獨對上乃曰向用李某蓋不得已今敗事矣朕悔不用卿所舉之人也六月北虜小王子遣使求貢甚急近又燒殺墩軍大同守臣以聞大夏具奏北虜大衆卽今在宣府地方住牧亦有東行者若寇宣府山勢險阻若寇大同有延綏遊兵在此必與朵顏相通畱虜衆於宣大邊外以制我之兵分遣精銳或從喜峯口或從燕河營不數十里卽係腹裏朝入搶掠夕可計歸乞揀精銳官軍於永平

密雲三處相機截殺仍揀集順天真定等八府民兵備護京師  
俱切中機宜 上以兵事屬中官苗達謀出兵圖之密言於

上乃詔問計大夏曰聞從征將士言當時全仗 朝廷威德乃獲  
遁免 上曰永樂頻出塞破虜今何不可對曰 皇上聖武固  
同於 太宗奈今將領兵遠有不逮且當時如淇國公丘福稍  
違節制數萬甲兵俱陷虜地況今之將又在丘福下不若且令  
各邊料敵戰守猶似得策 上乃悟曰朕幾爲人所誤事遂止  
上益明習國事有大政大疑必召至內殿面與參決嘗召問天下  
衛所軍士何如對曰與民一般窮安能養其銳氣 上因在衛  
有月糧從征有行糧何以至窮對曰江南衛所困於運糧江北

衛所困於京操此外浪費猶有臣等不能知者所以俱窮上  
翼日詔各衙門凡有損於軍民弊政悉疏以聞上欲於附近  
地方團操人馬以爲京師左右掖問策對曰京西保定府地方  
獨設都司統五衛仰思祖宗恐亦是此意未幾一御史陳言  
擬將保定兩班一萬人回衛團操差遣奏入上可遂勅京營  
都指揮戴儀往任其事乃有造飛語帖於宮門誣大夏上曰  
宮門豈外人可到必此曹忿不得私役此軍者所爲耳及修  
清寧宮有旨下兵部撥用軍夫萬餘人做工大夏知工少人多  
蓋監督中官有所利而爲此也上言減去十分之五督工者訴  
於上上令司禮監語內閣曰劉大夏不以朝廷大工爲事率

意減去人夫卽調 旨下切責大學士劉健曰愛惜軍人司馬  
職也近日劉某每以老辭位 朝廷每下 溫旨勉畱尚請之  
未已若切責 旨下彼將以不職辭更於何處討這等人來替  
他司禮監以其言入告 上欣然納之用軍夫卒如所裁之數  
十八年乙丑春召大夏與左都御史戴珊入各對畢 上令中  
使出白金二錠以賜且 面諭曰卿等將去買茶用朕聞朝覲  
日文官避嫌有閉戶不與人接見者如卿等雖開門延客誰復  
有以賄賂通也朕知卿等故有是 賜且命不必朝謝恐公卿  
知之未免各懷愧懼也 上一日召大夏而語曰事有不可每  
欲召卿商量又以非卿部內事而止今後有當罷者卿可爲指

帖密封進來對曰不敢 上曰何也對曰先朝李孜省可爲鑑  
戒 上曰卿與我論國事豈孜省營私害物者比乎大夏曰臣  
下以揭帖進 朝廷以揭帖顯行是亦前代斜封墨勅之弊也  
陛下所行宜遠法帝王近法 祖宗事之可否外付之府部內咨  
之內閣可也如用揭帖日久上下俱有弊且非後世法臣不敢  
效順 上稱善久之又一日召大夏因言天下何時太平朕幾  
時做得如古之帝王對曰求治不宜太急但凡用人行政有疑  
者卽召內閣并執政大臣面議停當行去自然順理便是太平  
上曰大學士劉健嘗薦劉宇才堪大用以朕觀之此小人也豈可  
用哉以是而言內閣亦未可盡託大夏每被 召入廷奏事至

跪御榻前 上轉首左右顧近侍內臣卽退避數丈地俟奏事畢復來侍 駕一日對久事畢欲起不能 上曰司理監來朕與劉尚書論事話長彼老不能興爾李榮與某扶掖出左順門外回榮且扶且謂之曰吾輩行事不好處多老先生於 上前幸隱惡揚善大夏曰 聖上天性聰明某於政事外未嘗敢輕易毀譽他人也某今日求退 上曰李榮亦在朕前說卿是好官如某者與太監踪跡疎遠不知何以如此榮曰當朝大臣公名第一榮何敢蔽賢也大夏雖職本兵苟可扶善類存國是知無不言言無不聽戶部郎中李夢陽建言指斥政事之非者上怒下夢陽錦衣獄一日批鎮撫具獄詞以讞有 旨令夢陽復

職他日獨召大夏奏事畢上曰近日外事若何大夏頓首曰  
近有旨釋李夢陽中外懽呼聖德如天地之大上曰李  
夢陽本內事關戚畹且語言狂妄朕不得已而下之獄鎮撫司  
本上朕試問左右當作何批行一人曰此人狂妄宜付錦衣撻  
以釋之朕揣知此輩意欲得旨下便令重責致其死以快宮  
中之怒使朕受殺直臣之名左右不忠如此朕所以卽釋復職  
更不令法司擬罪也大夏頓首謝曰陛下行此一事堯舜之  
仁也又刑部尚書閔珪讞重獄忤旨批答久不下一日大夏  
獨對上因語及之對曰人臣執法不過效忠朝廷耳自古聖  
帝明王往往屈意從之閔珪所爲無足異者上曰且道自古



何君何大臣亦嘗如此對曰臣幼讀孟子內見舜爲天子臯陶爲士瞽瞍殺人臯陶亦執之而已今之法司恐事亦出此似未可深責也 上頷之明日旨下一依刑部所擬無改又光祿寺之設供奉內府御膳備辦使臣外夷宴享而已近成化弘治以來添有坐家長隨七八十員又有傳添湯飲內臣一百五十餘員天下常貢已不足用仍責令京師舖戶買辦官中不給負累市井賒借弘治辛酉夏因應天鳳廬淮揚蘇松等處民饑盜起因以前事執奏曰光祿日辦桌面不勝查算日殺牲口無慮數百既已損民之財尤虧愛物之仁疏上 上惻然下令裁減官民乃甦後光祿卿艾璞曰東山此奏歲省光祿銀錢八十餘萬

古云仁人之言其利博此之謂歟晚年對便殿以三營軍士多  
被占役騰驤四衛軍士投充大遼各營草場侵欺隱沒甚多議  
裁革節省上首肯久之且論以勿形奏疏蓋恐權貴中傷之  
方將有所釐正而龍馭不久上賓矣四上章請老乃從之正德  
丁卯近倖素不悅者謗大夏擅革勇士節光祿寺供饋激怒於  
武宗將及禍大監竊瑾知重之者叩首諫曰此先帝意非劉大夏  
建白遂免時逆瑾用事日誅求臣僚大學士焦芳劉宇欲中害  
之昌言云抄剽大夏可得金數萬瑾因尚書潘蕃總兵毛銳獄  
詞連大夏姓名戊辰夏遂矯制差錦衣衛官校逮之千戶羅某  
至廉知其貧雖以酒器爲贖堅却不受八月至京繫北鎮撫同

繫者教其行賂爲求生計大夏曰如此而死唯累一身稱貸免死則累一生且累子孫矣瑾怒欲置之辟會官議於朝堂左都屠滹曰檢律劉尚書無死罪瑾曰充軍罪亦無耶法司比附守禦官撫馭無方致所部軍人反叛律充軍十月遣戍肅州當時士夫以其出獄爲喜買黑雇車扶二僮以行故人贈送謝絕不受發都城日氍帽布袍徒步過大明門匍匐首乃行觀者如堵所在罷市父老涕泣士女携筐饌進果食亦有焚香密禱曰願公生還者已巳四月到配所衆以尚書稱發莫不加禮不欲至配成大夏曰某有罪不加之誅今又不服役耶披取撻銬與卒司又買地爲墓作終焉計人問其何不挈親子姓待行大夏

曰吾仕宦日不能爲子孫乞得一官今充軍老死顧令子孫補  
伍豈人情所安也庚午夏京師風霾蔽天寧夏眞鐸叛亂賊  
天下大夏得釋歸八月瑾誅復原官致仕卒贈太傅謚忠宣  
言行錄云公平生不以勢位自居爲叅政布政都御史日遇事  
有當行未嘗先洩事有疑難心未明不以公文顯行雖於屬官  
亦具手簡直述其事紙末必書名以此士大夫於公所委事無  
大小無不盡心竭力圖有成績期不相負人有言及勢要貪婪  
軍民有不得所者公必感額不樂於公所得爲者一一思以濟  
之吳廷舉嘗謂古人有言曰憂民如有病見客似無官公足以  
當之

又云公平生於功名富貴子孫福澤泊如也故自入仕以來由壯至老不營田宅之利官至大司馬不爲子孫求恩澤其功德在人耳目未嘗泯也公歸後大臣有子不當廕而自乞恩澤者言官參駁不允因言公官居一品子孫當得恩典公恥陳乞今宜舉例以崇廉退朝廷從之勘合已到公一無所言族人以公長子祖生已故孫如愚當廕公不阻其進不促其行不作朝中故舊書第云到京日先見西涯李閣老必有所處正德丁卯如愚到京見西涯時劉瑾方用事西涯云爾祖正人瑾方忌之其機無由發也入監禮部必請旨本內必及爾祖姓名瑾亮之媒孽平生吾見其禍未見其福也噫令速歸如愚至家公喜曰

西涯愛我一至於此

又云公平生不刻意作詩間有爲而作者事核意真情刻意具如蘇論山州句云如何萬頃桑麻地天與夷人作戰場雖土官岑清亦感也出錦衣獄中有句云紅塵未了清時債白髮重來此地遊登公爲兵部郎中嘗下獄也謫戍甘肅過六盤山句云綠野誤爲三品地白頭今到六盤山蓋以爲終於侍郎不起未必有此謫也謫所示子姪句云報國未能平海宇充軍終是累兒孫蓋以逆雖有司某永遠充軍批旨也又云猶有先朝宜召夢急趨黃閣不敢忘恩思孝廟君臣相遇千載一時雖在謫所不忘情也

詩曰時事何人苦變更邊城持戟半

儒生蓋刺劉瑾用事士大夫有罪多遣戍甘肅也至赦歸過六盤則直述其事曰憑誰寄語中州子前度劉郎今已還蓋公下獄充軍事雖出於逆瑾禍機則發於大學士劉宇也宇河南人嘗告瑾抄劄公云

又云公與吳廷舉書曰居官之道以正已爲先所謂正已非特當戒利亦當遠名吾友於利固素知其澹然矣苟有意近名則凡事皆有所爲而爲卽程子所謂今之仕者爲已也將此以往而欲政善民安以成佐理之功恐未可得幸熟思而自考之事上治下皆當主之以誠行之以恕誠則自然動物恕則服以上下之情體其情而感動之將無人不可馭無事不可爲豈徒因

治郡而已哉

尚書吳廷舉撰壽藏記云公於本兵外知無不言言無不聽國有大政大疑每召公至內殿面與參決所議雖左右貴近元勳輔相有不與聞者公亦不以告人玉帶蟒衣元寶之賜迥出諸大臣之上賜諡有周廊英姿湖湘閭氣之褒

實錄云公嘗撰作壽藏於東山之陽記曰予嘗見士大夫家子弟愛其父兄者俟其身歿必求名儒大筆鋪張其行業以誌於其墓作國史者或憑而采之予無似承祖宗世澤竊科甲官祿前後四十年在家在邦無一事可述以傳者萬一後人私所親謬言以誤名筆縱可欺人而不自愧於地下也耶用是自述平



生履歷書而勒諸石付兒祖生等藏之以俟他日其詞雖俚其事則核庶予之心安焉西涯李閣老見之戲云天下皆如公翰林文章無用矣公曰先生輩文章宜紀有大功德者予非人敢以相累哉

尚書邵寶作前傳云公嘗以先世二宗族屬疏故墓幾弗可識作敦本堂歲舉二祭祭畢有燕以合族人且爲家規誦燕所教子姓讀書兼力農務嘗命督耕雨中曰習勤忘勞習逸成惰吾困之將以益之也

又云公爲詩文有自得之趣教秦巖議義筆立就而明付切要轉折流通足以動人西涯李公謂公乃昔人所謂興物無競也

事有爲者不誣也公敍歷中外八遷厥官討寇者三行邊者三治水者一皆天下之所謂難事而從容暇豫以能有成功壯而奮庸老而委順而皆不失已焉非盛德其孰能與於斯

實錄序云公之爲人也明識治體如賈太傅通達國事如陸敬輿質直不阿如汲長孺廉潔不私如包希仁忠誠懇切如司馬君實焉是故先民之遺軌也世以爲確論

許進字季升河南河南府靈寶縣人成化丙戌進士擢浙江道監察御史累官戶部左侍郎兼左僉都御史提督宣大軍務致仕弘治十八年北虜寇大同戕二遊擊將軍事勢急迫科道復交章奏薦六月武宗召爲兵部左侍郎提督京營人馬復

命兼理部事疏辭且薦都御史雍泰代已不允凡差官守取者三  
行巡撫都御史催促者二正德丙寅四月始覲闕下復具疏  
辭不允五月廷臣會陞兵部尚書仍督團營未幾命預經筵進  
乃上疏上嘉納之詳見吏部進方起廢居官五月章凡十數  
上多與權貴爭論事其奏討車船頭目出常例者皆執奏不與  
時有太監王岳奏稱官校王縉等十餘人緝事挈賊有功得  
旨官校陞一級王縉象房管事進執奏謂賞罰人主之大柄當功  
則勸浮功則懈各邊官軍萬死得一首級止陞一級比之此輩  
勞逸懸絕此命一行各邊聞之孰不解體大監陳貴銀衣千戶  
蕭瑄總旗韋寵張鑑等各奏稱有擎賊功希圖陞職大監劉六

亦爲其姪乞官忤格不行且請治貴瑄等罪以爲奏擾者戒魏國公爲言者劾其聽信下人不法諸事定國公新寧伯各自陳乞加品級進曰勲臣乃武職領袖所爲如是何以令人皆請究治或加切責以彰懲戒京衛武職有以賄營求者進呼至部堂大杖數十郎中林庭楫每言曰只此一事已痛快人心然非公不可也團營及三大營聽征官軍爲內府做工借撥太多頻致逃亡進疏言團營非爲營造而設且養兵之道必於無事時結其歡心作其銳氣有事方可得其死力因備論內監役占軍匠納錢諸弊反覆千餘言章凡三四上有詔以陳新等五百餘名收充勇士進極言投進濫收之弊糜費糧食俱宜革退南

京御馬監收養馬騾八九十匹役軍士千名費芻粟鉅萬尚書  
林文安公瀚給事中牧相奏宜裁減進請准行又條陳八事其  
重者曰邊 成命欲將內府役占軍士三萬三千名革退送操  
并治中貴沮撓 成命之罪曰革冗員欲將午門等門并九城  
門多餘內官取回別用毋令資緣添設曰甦困苦欲復嘉蔬所  
舊制革司苑局科苑軍士顧陪等弊曰重爵賞欲裁革傳陞冒  
濫軍職前後論諫雖或不得行然 國家典章尚賴以存者爲  
多海賊鈕東山爲患東南守臣奏已殄絕進參勘謂事涉不明  
未幾果復出爲寇正德初公卿臺諫共劾羣倖之罪衆必欲寘  
之極刑進獨曰此輩得漸疏斥足矣何可激也甘露黨劄之事

不可不監後丁卯之變果如其言其先見如此十一月改吏部尚書詳吏部

霍韜平番始末引曰許襄毅之成功也有六善焉威信洽乎夷戎歸心一也小列禿效義我得夷助能制番囚死命二也善用謀人謀則中機三也誓言遠征不惑浮議不忌勞費四也節醜宵遁坐策全勝綏恤協從而安定之五也動思遠謀不急近功不多戮馘六也又曰襄毅生八百死命仁人也有後宜哉增

閻仲宇字



陝西鳳翔府隴州人舉成化乙未進士授鹽山

知縣鹽地俗鴛戾尚氣力銓司以其僻卒選庸猥者治之故弊紛不可理仲宇審察利病務當乃指摘搜剔必盡湔除乃已監

司賢之檄理隣邑疑獄以明允著稱久之以薦召拜湖廣道監

察御史論事得大體不邀皦皦名奉勅巡按等處用法

嚴絕不貸賊吏久之陞山東副使至則審其所宜興廢躬蚤夜

治文書時時出行部偏州下邑無不有跡所至以洗冤抑摧姦

宄爲務旣以勞陞浙江按察使益勁直不習爲縮朒遇事一不

可於意卽剛振發溢不自禁尋進左布政使慎出納均徭役周

慮曲畫又解結疏滯常不煩事集浙人安之弘治十一年己未

擢都察院右副都御史巡撫湖廣地方時全楚浣罹大災設法

賑濟饑民仍具疏乞蠲賦額又永順保靖等處山苗時發并

庭上下水寇攘標爲黎民患各嚴憲禁頒竹符檄守巡坐鎮之

杜其往來而楚恃以無虞踰一考召理院事進左副都御史戴  
珊獨振風紀爲時表率仲宇協心一德而臺綱肅然十七年小  
王子遣使求貢甚急兵部奏遣廷臣勅整理邊關糧草缺欠特  
陞兵部右侍郎兼右僉都御史總督宣大軍餉時沿邊調集延  
綏等處游兵軍費不貲仲宇酌盈濟虛未嘗告匱十八年事竣  
改兵部與劉大夏尚書許進左侍郎熊繡請邊務商確而行正  
德元年進左侍二年陞尚書代許進掌本兵兼督團營因御史  
王齊題馬政廢弛欲早正種馬具論先時議者欲併去種馬止  
照地畝人丁出銀買馬此固可革時弊但祖宗養馬之法不  
可廢壞爲今之計種馬地畝人丁歲取已有定額但要種兒騾



馬揀選四歲五歲以上十歲以下高大者在畱矮小老弱者賣  
價區處買補湊完原數照額養在民間府州縣官一年四次太  
僕寺官一年二次止點視務要臚壯病瘦者依律問罪倒失者  
就令陪補永爲定例設有緊急亦可調用邇年有無孳生不必  
追究太僕寺歲取備用大馬止照種馬定額派行各府州縣買  
解假如十萬種馬歲取備用一萬只得十疋買一疋以地論  
之則出於五頃以下論之則出於二十五丁五十丁衆輕易舉  
就取三萬或銀馬中半百姓亦皆願百姓止養馬馬既不爲孳  
生受害設有生好駒起俵變賣悉聽自便利之所在又人所必  
與豈有不用心看養種馬依時羣蓋而取孳生自然之利乎因

者定兩京太僕寺所屬府州縣衛額種兒騾馬一十二萬五千  
匹兒馬二萬五千匹騾馬十萬匹太僕寺所屬府州縣種兒騾  
馬八萬七千五百匹兒馬一萬七千五百匹南京太僕寺所屬  
府衛州縣種兒騾馬三萬七千五百匹兒馬七千五百匹騾馬  
三萬匹至今守之不失未踰數月逆瑾欲用劉宇加太子太保  
致仕卒贈太子太傅

劉宇字志大河南開封府鈞州人成化壬辰進士授上海縣知  
縣累官右副都御史巡撫大同宇心術不端有巧才善結奄豎  
弘治十八年宣大缺總督吏部尚書馬文升以同鄉薦陞右都  
御史總督宣大軍務兵部尚書劉大夏素薄之因 孝宗召見

言字在大同私養官馬饋送權貴 上密遣錦衣百戶邵琪往  
察之以養馬未送回奏司禮監掌印大監李榮亦河南人解之  
得免究正德二年逆瑾勢傾中外宇附大學士焦芳結瑾入爲  
左都御史掌院事尋轉兵部尚書兼督團營加太子少保又託  
保國公家人朱瀛者交通逆瑾無日不來兵部說關節四司官  
不附宇者言於瑾必傳 旨令外補故四司官公然依附矣時  
兵部郎中楊廷儀能文又大學士楊廷和弟宇利其文學又圖  
結廷和凡章奏皆令廷儀草之廷儀主議武舉改文場考試策  
論用翰林官爲主考宇欲因議以自顯遂令廷儀具草欲依倣  
唐之增置宋之詳定事叅酌會殿一試事例少加損益每遇文

舉鄉試之年亦將武舉預期行移南北二京并十三省令其轉  
行軍民大小衙門出給告示曉諭各色人等如有究極韜略精  
通武藝身家無礙堪應武舉者或隱於山林或育於學校或羈  
於戍卒或系於仕籍各赴所在官司投報籍貫脚色查審明白  
屬軍衛者禮送該管都司屬有司者禮送本布政司俱送巡撫  
都御史并巡按御史其南北二京亦令軍衛有司送南北直隸  
巡按御史帶管考試所考人材如果謀略弓馬可取就令各該  
衙門禮送兵部會萃數目請於次年夏四月開科兵部堂上官  
并提督京營總兵官總領大綱兵部司屬官分理衆務初九日  
初場較其騎射人發九矢中三矢以上者爲合式十二日二場

較其步射亦發九矢中一矢以上者爲合式俱於京營將臺前較閱十五日三場試策二道論一道於文場席舍內試之照依文舉梓其姓名錄其弓馬策論之優者裝潢成帖題曰武舉錄進睿覽上准行之至今以爲例及欲改吏部通保國公家人朱瀛構陷尚書許進以去而攘之詳內閣

曹元字以貞大寧前衛軍籍直隸和州含山人成化乙未進士授戶部主事歷工部員外郎郎中簞簋不飾素結庵豎弘治末驟陞浙江右叅政河南右布政使山東左巡撫甘肅右副都御史累陞都察院右副都御史巡撫陝西地方爲人卑瑣柔佞突梯滑稽素無善狀因與逆瑾親舊不次超遷正德二年逆瑾專

柄恣橫以大學士焦芳爲腹心又引劉宇爲兵部尚書召元綱  
右侍郎轉左三年宇改吏部進元兵部尚書尋加太子少保時  
紀綱紊亂賄賂公行於文事則委劉宇武事則委元凡大小文  
武官員陞遷除拜皆以賄求及抵任各官浚削民膏以償債負  
至總兵將領又毒刻軍士慘不可言而國家大權敗壞極矣未  
幾劉宇與元俱入閣卒之寧夏肇亂山東河南四川江西等處  
盜賊蠭起雖瑾爲首惡於五年伏誅而劉宇與元猶倖脫天罰  
僅黜爲民君子猶有餘憾云餘詳內閣

胡汝礪字良弼其先應天溧陽人也祖士真以醫累謫戍寧夏  
左屯衛遂爲寧夏人年二十二歲中陝西鄉試成化丁未進上

授戶部主事監理清源芻粟力祛宿弊狡吏莫之敢奸後進郎  
中丁父喪顯用朱子家禮西夏之人至今倣之服闋授戶部郎  
中督餉山西不至期歲邊儲告裕北虜犯大同無可與守者冢  
宰馬公擢知大同適歲旱鎮巡零禱弗應公痛自省跣足祈求  
忽大雷雨四郊霑足民爭頌曰此父母雨也於是總戎重臣不  
束其下毒及兵民乃曰此內韃靼也身痛抑之厚忤重臣遂疏  
疾求去冢宰用 廷議覆 奏其可大用真無疾卽疾亦可用  
不可去 敬皇俞之乃卒不去越二年陞順天府丞期年進府  
尹順天雖首善之地勢族豪右十七其民動遭齟齬礪低昂其  
間畿甸之內亦有陰受其惠者正德三年遂進戶部右侍郎

勅董宣府邊務尋改兵部左侍郎兼僉都仍蒞邊政拓宣府屯田  
尋進兵部尚書未任卒於官幼時陳太夫人病目暴熾方讀書  
歸見之曰母目若此吾何忍用明也乃捐書不治絕其滋味夜  
焚香祝天形容憔悴居三月母夢神人告曰爾無慮爾目爲也  
爾子之孝爾目爲當愈矣夢覺腫翳漸殺不旬日而愈至爲主  
事聞祖母酒太夫人之訃哭踊幾絕外寢素食期年而後已弟  
汝楫同學教愛篤至汝楫舉進士令任丘時以府丞提調順天  
鄉試匆遽中猶爲作爲政要略一帙予之其言今視之皆可爲  
式也鄉同年任良者居太學貧不能堪然孤介不干於人蒙面  
賣卦以自給故相識者皆莫知也時在戶部獨禮之良且死無



子其妻不能具棺也買棺與歸其喪同部主事壽儒死於官妻  
子孤弱遣弟汝用歸其喪父友趙儒死於大學令弟汝楫歸其  
喪語曰種苗看豐交友看窮比昵之合惡乎有終人稱其善與  
人交孝皇賓天憂形於色入臨必慟絕蔬食別寢二十七日同  
衆嘲之爲孝臣與邵寶以文章詩賦相磨切今所遺有竹巖集  
數卷說者謂逆瑾興屯田嚴刻增地畝以追完積逋爲能亦不  
免匪人之比云

王敞字漢英南京錦衣衛人少敏警選爲應天府學生有時名  
提學御史戴珊婁謙俱加稱賞成化庚子以詩經薦於鄉試明  
年辛丑中會試第三人賜進士出身乙巳授刑科給事中出

閱四川建昌松藩諸鎮邊務稽處有法軍餉不羈還上便宜六  
事其一言建昌往時歲起礦夫若干今事旣革而夫尚爲權家  
所占請罷免從之丁未陞工科右給事中弘治戊申 孝宗卽  
阼 賜一品服使朝鮮國其國主令陪臣出女樂燕敝曰 天  
子在諒陰中吾何忍此其國君臣相顧愧嘆乃遣去己酉陞左  
給事中充禮部會試同考官辛亥陞都給事中奏減兩京柴薪  
夫又奏以各科所積柴薪餘銀助修六科朝房工費其餘奏疏  
甚多俱不留乙卯推補通政司右叅議丁巳進左叅議戊午陞  
左通政壬戌丁母憂服闋仍爲左通政正德丙寅進通政使初  
天下奏章皆諸吏分掌出納得緣爲奸至是置大櫃列後堂親

封鑰之弊遂革戊辰以考績陞兵部左侍郎仍掌章奏庚午年胡汝礪進尚書卒遂歸兵部尋陞尚書命兼督團營敕任本兵頗勤慎每選天下官必語其屬曰此皆我祖宗報功盛典非倖致者比毋事深刻寧過于厚可也武功黃選簿在內府印綬監凡除選入內查對輒爲所難例納賄乃得如期對視請騰付於部以便選法未幾命兼提督京營戎務賜蟒衣玉帶夏四月寧夏賊臣何錦周昂丁廣挾宗室寘鐸以叛戕殺鎮巡重臣傳僞檄召調各路兵馬僞鑄印章封拜其黨以誅賊瑾爲名刻期將渡河關中震動武宗命御用大監張永總督軍務涇陽伯神英充總兵官起右都御史楊一清提督軍務往征之先是

陝西總兵官曹雄約會諸鎮將官協謀討賊會靈州寧夏遊擊將軍仇鉞初被何錦賺調入城已而約爲內應糾集義兵乘間手斬賊帥周昂并殺其黨遂執寘鐸父子眷屬械繫之執何錦丁廣於大壩餘賊悉就縛捷聞一詔神英以兵還張永楊一清往撫諭用寧其人及永至寧夏回謀於途必因此除瑾旣至京永訴於上前以謂瑾激變寧夏心不自安陰謀不軌其形已具宜早處之上允其奏執瑾就內獄黎明送錦衣衛坐以謀反凌遲處死悉誅其家屬抄沒財產京師稱快咸頌永功李東陽楊廷和亦奏瑾惡以爲旬日之間二難交作悉底平定歸功於永等封張永兄富爲泰安伯弟容爲安定伯魏彬弟英爲鎮

安伯馬永成弟山爲平梁伯谷大用弟大玘爲永清伯封義子  
朱德爲永壽伯各給券世襲廕李東陽楊廷和梁儲楊一清子  
各一人中書舍人楊一清仍陞戶部尚書加太子太保敕加太  
子少保廕子會爲錦衣衛百戶時瑾甫誅乃申明舊章凡瑾所  
更置盡革之初霸州文安諸處鄉馬強賊生發瑾欲速除之遣  
御史寧杲於真定殷毅於天津薛鳳鳴於淮陽專一捕盜令携  
家眷責以滅賊爲期鳳鳴在歸德與守備指揮石璽會飲令人  
歌舞爲樂瑾邏卒奏之降鳳鳴爲徐州弓手毅在天津稍收斂  
惟杲奏立十五連坐之法盜賊捕獲無盡日每械係盜賊入真  
定城用鼓吹前導金鼓之聲彌月不絕由是奸人無所容盜賊

多內官張忠姪張茂爲大盜窩主杲親往捕獲斬之啖其心髑  
州盜劉六劉七齊彥名輩因是聚爲亂當時若遣驍將五人各  
統勁兵一千分路而出聽其便宜襲捕惟以平賊爲功不論首  
級多寡不旬月而平矣敝不通政務止行有司緝捕已獲齊彥  
名收安肅縣獄劉七等十餘人刼去旬日之間聚至數百所至  
窮民嚮應增至數千敝束手無策楊一清爲吏部尚書建議推  
用大將征討及文臣有才望者提督軍務又着有能擒斬盜賊  
三名顯者陞一級李東陽從中票 旨極其褒美悉從所言行  
之故事凡大政必下該部詳議覆奏然後施行今捕盜不關白  
兵部徑准施行由是言官爭論敝不職乞速罷黜張永素悅敝

不能留令敝掌通政司事以何鑑代之尋乞休致又四年卒贈太子太保敝天性孝友母夫人迎居京師以能養聞從子企愛若已出蔭爲國子監生有犯不與較風神清散若於世故不經心者然所任以歷官清慎稱之其守亦可取云

何鑑字世光浙江紹興府新昌縣人成化戊子領鄉薦己丑登進士年非三十以上弗選近侍鑑甫二十八鄉先達有勸增年者鑑曰未入仕先欺君可乎庚寅竟出知宜興縣縣歲輸米數十萬石運戶攬納者妄費民苦額外加徵償貸動以萬計鑑力請於巡撫每里選殷實六戶以二充運戶四充運夫共運米一百石每一戶徵銀十兩泊耗米若干並付總部收支回縣稽覈

重徵之弊遂革又歲貢茶一萬五千斤例領南京馬快船裝送  
船軍無統紀惟私載射利反致官茶攘竊汜腐歲亦額徵貨百  
計又請每茶一斤收解錢三文雇船裝運罷馬船民皆便之隸  
兵火甲積年漁食小民一切罷革拘攝催徵惟責里役逾年宜  
興稱治一日村老百餘輩携二童捧薯蕷五束茶少許詣庭下  
曰吾儕小人不識官府自公下車犬不夜吠人安寢食故來見  
耳羅拜而去巡撫都憲滕昭畢亭剡章交薦銓曹亦以政績卓  
異聞甲午召陞山西道監察御史乙未巡城捕盜時禮部奏度  
僧道請度者數萬相聚擾惑爲非乃建議寢其事禁逐散去丙  
申巡口北宣同等處時中貴廖禮協恭將周賢按妖人趙大事



因誣良民受僞署者百餘人以聞 上命覆按失實乃責廖禮等曰妄殺無辜希陞賞論死者止三人徒者四人餘得免奉勅會給事中唐章查盤邊儲幕禮乃論黜監司以下不職者數十人連劾巡撫都御史鄭寧殷謙郎中曾會劉顯馬孝祖輩請逮捕繫獄殷謙停俸餘皆置之法時權要子弟以攬納妄繩部運官吏虛出硃串因併論舊部下裨將孟璽胡觀等置於法者四十人餘皆落職邊境肅然戊戌差巡京倉首禁需索逮捕總督大監等麾卒置於法總督怒搆東廠下鑑錦衣衛獄竟亦不能害已亥巡歷鳳廬淮揚等處鳳陽 祖陵所在禁限綿涉二三百里凡盜寸木坏土者例皆處死充軍守衛者每以法害民鑑

首申禁令許山間巡邏其平原地土聽民樵採留守都指揮馮  
騰冀彈挾勅怙寵罔法疏其事於朝工人卒以罪去官開釋  
諸冤獄坐死者十數輩辛丑擢知河南府河南商周漢唐故都  
多塚墓往往爲民所發下車首嚴禁令人不致犯屬邑宜永嵩  
盧有鑛洞封閉已久朝廷特勅大監陳喜同鎮巡開取鑑  
曰鑛脉已竭若更起常課是貽吾民以無窮之害也執不聽  
上復遣大監梁方開取卒無所得而止甲辰乙巳丙午河南山陝  
連值凶歲餓殍流徙相屬請盡出府庫銀兩遣官糴黍豆若干  
萬石分賑屬縣且令預收草子充饑復條陳救荒禦災十事具  
申鎮巡奏聞多見施行先有徵完糧稅以災停解至是詔

蠲逋負差官賑濟故屬縣皆有備而內帑救荒之賜總司皆以給親藩官軍俸祿上下賴焉流民死者命於四門設坑塚塋埋幾七八萬軀遺孩收養濟院三年之間地方狼戾多相食盜賊殺官劫庫檄報紛紜獨河南一郡晏然當道特下鑑荒政於各府以爲武洛陽地方不滿百里稅糧幾十萬鑑以南陽汝寧二府稅糧亦各止十萬餘石何洛陽一縣顧與二府相埒具奏懇切准照江南折銀事例充數丁未春陞山東左叅政將行軍民老弱號泣攀送南京工部尚書侯璚薦其存心正大處事公勤宜大倚任弘治庚戌春陞四川布政司右布政使四川國初設茶課司歲徵茶數十萬斤與夷人易馬永樂以後夷人悉

由陝道故茶課浥爛官吏老不得代乃議徵銀解部官民便之  
松茂邊儲歲苦豪黠攬納弊根牢不可拔悉擒置於法其弊遂  
革壬子冬轉本司左布政使入 覲癸丑春二月陞都察院右  
副都御史總理江南糧儲巡撫地方兼理浙江嘉湖杭三府稅  
糧 國家貢賦仰給東南比年災傷公私困竭鑑訪究弊源以  
次興革甲寅蘇松大水饑民嘯聚攘寇官不能禁乃以便宜發  
未起運米十五萬石遣官分投賑卹又曰水旱災傷歷代所不  
免薄征散利荒政所不廢乃條陳折兌運折祿米折食米折軍  
糧停料價停織造留船料留課鈔開鹽引存工價共十事以聞  
又疏乞照往年川陝存留折銀二十萬兩兌軍米三十萬石分

賑各屬皆准行之故所在民不知災九月奉 勅同工部侍郎

徐貴濟吳淞白茅等港以泄積水衆議費無所出乃請以兗軍

諸費充焉又以治其地卽役其地之人分地程工分工賦糧使

官賴民之力民賴官之濟用米二十八萬石人二十五萬衆不

以爲勞費不旬月厥工告成松江小民苦於論糧加耗不敢更

易鑑以小戶多官田而糧重大戶多民田而糧輕遂令有司論

田加耗民甚稱便乙卯正月丁父憂丁巳服闋起巡撫山東山

東南北要衝接遞夫役歲計四五萬人官府濫增吏緣爲弊民

不堪命乃度州縣繁簡酌里分多寡分派夫役立爲定規臨清

德州倉場權貴攬尅納充巡捕官兵倚勢害民悉擒治隸戎籍

者數十人闕里災舊廟金章宗所建規模卑隘爲請於 朝  
拓增建計工料銀十五萬兩皆取於抽分鈔關不歛於民己未  
冬陞刑部右侍郎 命訊周藩大獄復命稱 旨賜羊酒寶楮  
陞本部左侍郎辛酉秋奉 勅同三法司審錄罪囚 賜羊酒  
冬十一月山東兗州等府直隸徐邳等州大旱奉 勅便宜賑  
濟首陳五事一借糧餉以資賑濟二乞通融以拯時艱三停料  
價以止無益四寬差役以寬民力五停工作以待豐穰悉 報  
可時巨盜弄兵亟命有司賑濟饑民招撫流亡牛具種穀區畫  
備至壬戌七月訖事 賜寶楮以勞之九月奔母喪南還時兩  
居憂備知鄉邑利病悉以興革達司府力請施行築長堤以禦

水患請度田以清稅糧減軍需以助夫役革冗員以裕民財改  
京運以蘇民困除徭役以節民費減圖里以實版籍請賑濟以  
活餓殍併倉廩以便防守修通衢以便往來之類鄉人銜恩感  
德相與醵金建祠肖像奉祀乙丑服闋適戶部獻民數孝廟  
按圖數戶以爲當今生齒繁盛戶口宜盈而虧宜登而耗弊在  
逃亡流移脫漏埋沒命簡大臣考覈廷舉鑑以刑部左侍郎  
兼都察院左僉都御史清查河南湖陝三省瀕行孝廟賓天  
武宗嗣位復申命鑑乃刊條檄申詳勅旨二十餘事俾三省各  
知遵守自河之南河之北漢之左右窮鄉險道無不躬親巡歷  
仍奏委三省藩臬分方任職以督厥成隱藏者省發飛射者燼

正流寓者不遣願歸者無禁民從役戎從伍匠竈各從其業繼而爲甲畝而爲里設畸零帶管以待貧弱無所歸依之氓於是三省計清過流移逃亡戶四十萬有奇丁口百萬入編籍者戶二十三萬五千六百丁口七十三萬九千六百竣事而還賜羊酒贖鈔因疏處置地方十事以聞一曰請官給散戶田二曰處置附籍人戶三曰處置還鄉人戶四曰查理軍匠奸弊五曰嚴戶籍以革脫漏六曰嚴版籍以清里甲七曰嚴禁捕以靖地方八曰專委任以總地方九曰均田賦以安小民十曰設衙門以控地方復歸功於王瓊等一十二人請量加旌擢復陳途中所見軍民利病六事清允支以實京儲處驛傳以祛宿弊足兵



食以備不虞停夫役以蘇民困添佐職以備任用均差操以障  
地方奏裨新政秋七月奉勅會同三法司慮囚賜羊酒丁  
卯春陞南京兵部尚書叅贊機務時逆瑾擅權內外諸守權貴  
皆出門下鑑毅然不顧首檢覈大小教場神機等營并操江官  
員刻剝者罷黜隱占者發舉軍中積弊一朝頓革及考選五十  
一衛所軍政官一以至公請託不行權貴斂手戊辰南京大饑  
饉瑾幸國災不允賑濟且勅南京運米三十萬石轉郵鳳陽  
鑑以留都地方重於鳳陽災傷甚於淮西會同內外守備直言  
辯奏始得停運及差官賑濟已而瑾凶焰益熾附之者紛然鑑  
未嘗與之一通訊問及刑部都察院長員缺廷論三薦之瑾終

不用其黨錦衣衛千戶張文冕者鑑先巡撫蘇松時以詐僞事  
捕置於法後亡匿附瑾朝夕煽禍無所不至竟誣松江官布事  
於瑾罰米七百石原籍上納慨然鬻產完之繼又捏闕里修造  
事罰米一千石寧夏上納鑑計無所充戶部隨爲乞恩寬宥  
上特命蠲之庚午八月逆瑾文冕伏誅辛未春正月 特詔爲刑  
部尚書三月朝見 命侍講經筵讀廷試卷賜通鑑纂要四景  
一回文詩夏四月當慮囚之期 上命太監張永詣大理寺偕部  
一院官審囚凡矜疑閱實奏疏悉出其手明允稱 旨賜羊酒夏  
五月審錄米竟 上允廷議改兵部尚書奉 勅提督團營軍  
務賜蟒衣王帶先是逆瑾煽亂人心積憤盜賊皆以誅瑾爲名

故寧夏初平定之後劉六劉七齊彥名楊虎李隆朱亮起於畿  
甸流劫南北直隸山東河南山西湖廣等處藍廷瑞鄒本恕方  
一四劉烈起於四川漢中荆襄等處李四將汪成一王浩八起於  
一江西桃源洞華林寨大帽山等險各竊偽號攻陷郡縣屠戮守  
臣敵殺官軍聲勢張甚朝廷先已命刑部尚書洪鍾總兵官  
楊宏往四川都御史陳金副總兵張勇往江西又命都御史  
馬中錫總兵惠安伯張偉往直隸山東等處各領兵征討時承  
平日久民不知兵郡縣望風奔潰甚至開門迎款以故南北不  
通人情洶洶卽建議選將練兵嚴號令公賞罰募義勇起用遊  
瑾罷斥舊將都督白玉等數人奏行山東直隸等處修濟城陞

選補軍餘機兵錄用民間武勇不許遺以資賊鄉村鎮店結伍  
立柵互相應援河南山西等處設兵守黃河斷大行以防奔突  
京操官軍俱留本處分守郡縣又於漕運十二把總部下每船  
選精卒一人沿河駐劄以防運道商旅又請立大賞以消大患  
詔悉從所議六月八日賊攻破棗強知縣段彥死之遂屠其城破  
廣平清河南宮故城獻縣而北秦遣都督張俊王琮統兵分布  
霸州文安賊聞復遁回山東時馬中錫駐兵德州張偉駐齊東  
賊衆散而復合去省城密邇鎮巡三司惟登城覘望莫敢開門  
發一矢乃劾奏馬中錫張偉擁兵自衛縱賊不戰鎮巡守臣怯  
懦不職及劾都指揮桑玉受財啓禍通事王永與賊交通皆下

獄桑玉伏誅王永亦斃於獄又請調宣府副總兵許太遊擊將  
軍卻永率部下入居庸關駐劄涿州延綏副總兵馮禎入紫荆  
關駐劄保定又奏請兵部侍郎陸完督理軍務凡軍容輜重  
山川地里險要一一規畫授以成筭賊圍滄州不克進抵霸州  
固安京師大震上御文華門召諭曰賊在近郊卿等將何處  
之鑑奏曰邊兵已到涿州賊來送死但恐望風遁去耳上喜  
諭曰若等就寫火牌調陸完徑往固安復諭曰朕直言直語卿  
等勿訝粗率鑑頓首謝承旨畢退至部中已秉燭矣遣人諭  
留正陽門鎖鑰賫牌到涿州戒以失誤者斬侍郎陸完方欲領  
軍南行而齎牌者適至遂直趨固安抵平口賊欲遁去諸將各

兵憾之大敗軍威遂振捷聞 賜羊酒侍郎陸完等乘勝進兵  
許忝敗賊於半壁店卻永敗賊於鑑橋馮禎新至遇賊於曹州  
迤西東明之裴子岩復大敗之斬賊帥之千戶 上欲遣大監  
谷大用領兵勦賊鑑與衆議謂陸完屢有捷音非軍威不振但  
賊奔竄靡常不可得耳今宜益兵四路守截我軍不勞而賊自  
滅矣 上以有成命竟復遣之初賊自東明之敗各已潰散有  
益都賊張興張旺者亦聚衆千餘在東平一路劫掠適主事張  
嘉謨督續調官軍至遂與卻永敗賊於高麗店殲殪殆盡賊覘  
知谷大用毛銳等官軍在臨清復奔霸州正陽忽縋城馳報蓋  
賊以十二月朔 車駕出郊宮省牲圖犯御蹕時鑑未寢左右

無一吏卒乃自具帖子令家奴遁入長安門就記守門中官姓名逐門遁入司禮監直房轉奏上知復寫牌傳各門嚴加防守又緹城賫報通州良鄉涿州各守備官整備人馬兼以常制駕出南郊分調人馬於南海子蘆溝橋羊房角三處下營以防衝突處分已定漏下五鼓矣頃之上命司禮太監召至左順門問今日駕可出否對曰駕當早出以安人心軍駕遂出迄暮方回賊知有備遂西奔掠新城雄縣定興安肅易州涞水而南破饒陽蠡縣博野容深澤束鹿覘知祁州備禦有方乃迂道徑攻臨地高邑保安高陽由真定掠趙州安平直抵晉州藁城栢鄉內丘南和衡水等處鑑計賊非東向臨清必南奔彰德

移文促陸完督兵分道追襲至彰德賊方圍湯陰聞官軍至望  
風遁去討太馮禎卻永金輔李瑾張俊成釗追戰敗之渡河陷  
溺死者無筭時十一月十八日也又明日賊衆萬餘突至復圍  
李瑾馮禎營許太與禎瑾夾攻賊失利敗走科道建議請乘此  
機會速加陞賞以勵之 上詔可陞賞諸將有差仍加鑑太子  
少保已而楊虎劉七分夥自宿遷渡河攻破睢寧靈壁虹縣轉  
掠至亳州奪船渡河百戶夏時用火炮擊之舟覆賊帥楊虎與  
其黨九人俱溺死部下劉三趙風子邢老虎代領其衆勢復猖  
獗入河南境攻破虞永項城沈丘西華上蔡西平確山鞏葉夏  
邑商水舞陽陽武鄆考胙城延津寶豐魯山泌陽息縣光裕等



州縣皆望風奔潰殺戮守土官兵圍燒房屋劫掠金帛發毀墳  
墓屍骸受禍極慘時裕州同知郁采率義兵力戰弗支死親  
藩及守臣告急鑑建議復於宣府許太邵永大同李鈺遼東劉  
暉延綏時源馮禎諸將部下續調未發官軍各若干分道赴之  
復以諸賊分責諸將計日勦滅而議請簡命遼東巡撫都御  
史彭澤與咸寧伯仇鉞提督河南軍務以前所續調官軍仍  
山東聽陸完等調用朝廷賜鑑麒麟服壬申正月二日忽使  
報賊仍抵霸州攻圍甚急京師復大震鑑默計續調宣府邊兵  
已到涿州密召郎中汪舉從容如無事時衆竊訝之舉至乃徐  
與衆別詣部押牌調邊兵之在涿州者亟趨霸州賊聞遁去

是陸完聞賊北奔恐犯京師卽調許卻二將追至德州馬不能  
進方懼獲罪忽報賊被許遊擊部下擊走東遁矣二將驚喜不  
知所爲久之乃知爲續調者嘗語人曰何公此舉旣解霸州之  
圍復紓吾輩之罪旣而遼東續調官軍亦至十二日駕出郊  
祀禮成上下帖然卻永率續調兵追賊至山東大敗賊帥李隆  
於穆陵關隆奔入劉七營劉七怪其反覆斬之遂併其衆復奔  
河南陸完分調諸將許太等率兵追勦適巡撫鄖陽都御史李  
士實亦請調湖廣土漢軍兵以備流賊鑑卽奏行李士實分委  
總兵方壽祥等赴河南會勦時源神周等軍尋亦俱抵汴梁諸  
將分兵截殺大敗賊衆斬獲無算賊夜奔商水倉惶阻河不能

渡官軍若併力威之賊可殄滅因紀功御史雷宗力勸諸將朝  
崇府盤薄久之賊因得渡商水破西華鄆陵偃城扶溝尉氏長葛  
洧川中牟新鄭鄭州榮澤等處至河南府賊逸我勞副總兵馮  
禎戰死賊亦敗去提督紀功鎮巡等官隱匿朝王誤事情實  
止以馮禎陣亡聞鑑効之徵宗下獄賊自河南之敗徑奔汝寧  
總兵仇鉞都御史彭澤分調諸將追勦所斬甚多生擒賈勉兒  
楊寡婦乘勝追逐趙風子兄弟就擒劉三走死河南寇平捷聞  
上降勅獎勵劉六劉七等乃東入陳萊掠膠州平度萊陽破文登  
招遠攻圍寧海潛入海套陸完等復分調郤永許太等諸將會  
兵追勦賊潰分作兩隊一隊由高密西奔者李鉞追至臨朐亦

水勦滅無遺其劉六劉七等一隊復北走霸州乃奏調叅將戚  
釗等統領京軍都御史陸完審杲亦各分調諸將會兵截殺賊  
乃越霸州徑往雄縣迤南直抵山東南渡黃河由鳳陽入湖廣  
至武昌擄掠濱江兩岸劉六爲先鋒調防守土兵迎擊溺水死  
劉七齊彥明益糾合水寇掠九江剽湖口劫彭澤等沿江一帶  
市鎮郡邑往來江上所遇輒遭荼毒陸完統領諸將邊兵馳至  
揚州斬退避指揮程鵬抵鎮江時賊已泊舟通州狼山完分布  
諸將於江西北要害處分捕天道効順撲毀賊舟官軍四面感  
之齊彥明授首劉七溺水死寇黨始盡無復孑遺時都御史陳  
金尚書洪鍾亦以平江西四川捷報 上論功行賞有差進太

子太保蔭子容爲錦衣衛百戶又特命進階光祿大夫勲柱國參西征四川餘孽復起具勅提督巡撫等官請命都御史俞諫總兵劉暉赴江西都御史彭澤總兵時源赴四川賊未平以人言致仕自爲卿佐踐上卿在朝多所汲引文臣如王瓊彭澤俞諫武臣如馮禎許太郤永時源等皆其推薦云

雙溪雜記云兵部尚書何鑑見京軍屢失利不能速平賊奏令陸完帶領主事田蘭手招募民兵擾害地方又奏調宣府遊擊許太郤永大同總兵張復遊擊江彬入征內地而又令俱聽受谷大用陸完節制令二人居中於臨清駐劄當時以部伍行陣之兵逐奔逸散走之賊而又率制於大用完之節制而不敢

行是以賊起。自正德六年至七年秋二年始底平定。皆李東陽、楊廷和、何鑑等昧於經國之理處置乖方之所致也。正德六年間流賊劉六、劉七、齊彥明等擾亂南北直隸山東河南等處地方。聚衆數萬。然多擄掠脅從之徒。其親信驍勇善騎射者不及千人。因東陽等准行首功之令。官軍每追及賊賊首驅逐脅從良民與官軍對敵。并棄所掠財帛奔逸而去。官軍爭斬首報功。并取所棄財帛以故劇賊得脫走。妄殺平民報功以萬計。每一遇賊斬獲脇從人首級輒報捷音降。勅獎勵谷大用、陸完得獎勅十餘次。而賊首無一獲者。其賊已過而官軍遇及平民亦殺之以報功也。江彬過冀州入人家殺二十三人有司申狀。

詣陸完皆不問自出兵後賊攻破城殺虜人民不可勝數皆不責問提兵者失律之罪雖劇賊縱兵但得脇從首級則輒紀其功後賊過江大掠吳楚之間至蘇州遇颶風覆舟始減歸而論功谷大用并代大用者太監陸閭皆封其弟爲伯陸完加太子少保蔭一子爲錦衣衛百戶其餘權勢所托奏帶之人以首級論陞者千餘人紀功御史皆陞京堂名爵之濫始此

陸完字全卿直隸蘇州府長洲縣人成化丁未進士擢廣西道監察御史歷浙江副使江西按察使有幹才逆濠獨器重之正德三年陞都察院右僉都御史巡撫宣府逆瑾見其言動遲緩改南院右僉都御史四年畏瑾威焰納賂於瑾陞都察院右副

都御史尋進兵部右侍郎未幾轉左及瑾敗言官劾完首開賂賂之門驟陞風憲之職不報六年霸州等處強賊劉六劉七齊彥明等肆亂都御史馬中錫以玩寇殃民下獄中官乃命太監谷大用總督軍務推完提督軍務伏羌伯毛銳掛平賊將軍印充總兵官時統兵萬餘素未簡閱銳又老弱大用擁衆自衛高坐堅城故京軍屢失利不能速平賊兵部奏令完帶主事田蘭等招募民兵大擾地方又奏調宣府遊擊許泰郤永大同總兵張復遊擊江彬入征內地多妄殺平民冒功完不能制後賊過江大掠吳楚之間至蘇州遇颶風覆舟始滅歸而論功谷大用并代大用者太監陸闇皆封其弟爲伯完進右都御史尋改



左都御史掌院事八年陞兵部尚書加太子少保時完與逆濠  
歲時問遺不絕濠問完欲乞復護衛完答書須以 祖訓爲言  
及逆濠輦金寶以伶人臧賢分饋柄事大學士費宏言於內閣  
曰今寧王以金寶巨萬打點復護衛苟聽其所爲吾江西無噍  
類矣完不聽竟附錢寧輩題復護衛十年閏四月改吏部尚書  
詳吏部

王瓊字德華山西太原府太原縣人成化甲辰進士授工部屯  
田司主事歷員外郎進都水司郎中弘治九年改戶部陝西司  
郎中有治才留心國計凡舊卷條例悉錄之以備稽閱累官至  
都御史正德二年陞戶部右侍郎三年改吏部調南京吏部戶

部侍郎丁憂六年起戶部右侍郎兼左僉都御史賑恤畿甸山東地方七年陞戶部左侍郎八年陞戶部尚書瓊在戶部陝西司於泉貨出入數目素熟練故在戶部於邦儲斂散酌盈濟縮不尚同亦不求異凡非分干請有違成憲者執奏不易苟可以厚宗室利官民亦調停行之人服其有心計十年改兵部十二年六月加太子太保十二年三月加少保兼太子太保先是左都彭澤在院時嘗與言官論及朱寧輒忿曰吾恨不手刃此奴瓊以語寧且曰吾爲君致彼來君私察之瓊因招澤過匿寧屏後瓊激怒之澤果大罵寧由是銜之會土魯番知瓊與澤有隙誣奏澤激變番夷以啓邊釁下兵部議瓊因劾其擅命遣使納

幣失信致起邊釁乙令法司按實議罪會多官議戶部尚書石玠以爲大夫出使於外苟有利於國家專之可也事須再勘璦曰納幣虜庭失信夷人致貽後患於國家利乎不利乎事已勘明更勘何事衆不能奪奏上朱寧管內旨除澤名十一月加少傅兼太子太傅瓊善結權幸故遷兵部不二年工進三孤初南贛撫鎮非人克民羣聚爲盜焚劫州縣無忌遠近效尤凡在虔楚閩廣接壤無非賊巢瓊薦王守仁巡撫其地及守仁請便宜行事衆笑爲迂屢不報瓊慨然曰朝廷此等大柄不與此等人用又與誰用我必與之竟覆議報可諸賊由是悉平十四年正月守仁乞致仕當路素忌之欲從其請瓊力言不可從留之

福州三衛軍人進貴葉元保等作亂瓊知江西寧藩必反召主  
事應典曰此小事不足煩守仁但假此便宜一勅書在彼手中  
以待他變爾爲我做一題稿來看旣成具題一勅守仁查處福  
州叛軍及給事中徐之鸞等疏宸濠不法事內閣楊廷和令兵  
部發兵觀變瓊曰此不可洩近給事中孫懋建議選兵爲江西  
備留中日久第如議行之廷和默然已而宸濠反南都告急瓊  
會衆於左順門獨曰豎子素行不義今倉卒造亂不足爲慮有  
王守仁在彼必成擒矣頃刻覆十三疏詔削濠屬籍正賊名次  
請命將出師趨南京勅伯方壽祥防江都御史俞諫率淮兵翊  
南京戶部尚書王鴻儒主給餉王守仁率南贛兵由臨吉都御

史秦金率湖廣兵由荆璫會南昌李充嗣鎮鎮江許廷光鎮浙  
江叢蘭鎮儀真慎防瓜州埧傳檄諸路但有忠臣義士能倡義  
旅擒反者封侯且令南京守備操江諸武職并五府掌印僉事  
卽自陳取上裁務在得人以固根本詔悉從之濠果不旋踵就  
擒計五年十月改吏部尚書加少師十六年世廟登極五月  
以人言謫戍嘉靖七年起兵部尚書兼右都總督三邊十年  
召還改吏部尚書詳吏部

王憲字維綱山東兗州府東平州人弘治庚戌進士

正德二年陞大理寺右寺丞三年轉左五

年陞都察院右僉都御史巡撫遼東六年守制八年起原官撫

治鄖陽十年改撫大同十一年以右副都改撫陝西十二年陞  
兵部右侍郎十四年改左宸濠反江西命督糧餉十六年正月  
陞兵部尚書兼督團營 世廟登極五月乞致仕許之嘉靖四  
年起兵部尚書兼都察院右都御史總制陝西三邊軍務時給  
事中鄭一鵬劾憲賁緣權倖御史馬錄請舍憲別用 上皆不  
聽憲簡靜嚴肅將士凜然不敢犯時虜賊千餘由花馬池入寇  
黑水苑憲調榆林各路兵合擊之斬首三百餘級捷聞降 勅  
獎勵加太子太保廕子錦衣衛百戶世襲七年陞南京兵部尚  
書叅贊機務八年改左都御史掌院事閑住再起兵部尚書加  
太子太保卒贈少保謚康毅

彭澤字濟物陝西臨洮府蘭州衛軍籍湖廣長沙府長沙縣人少慷慨有志節尚理學初爲蘭州學生以孝友誠確爲先提學浮梁戴公珊甚器重之成化二十二年舉於鄉初會試時前二場文論皆得意忽得家報言母夫人病劇卽束裝歸朋輩咸勸其少留終場必取高第澤曰吾方寸亂矣且母病與取第孰重遂行抵家母見之喜病亦尋愈人稱其孝弘治庚戌舉進士授工部主事改刑部進員外郎郎中能以詩書飾法比不如柔吐剛屢勘大獄犁然當乎人心有恃勢毆殺人者澤按之當抵罪或爲之賁緣祈脫死時勅遣中貴偕三法司錄重囚議將釋之澤執不可或以朝廷欽恤意爲言澤曰如死者何竟莫能

奪由是名聞縉紳間刑部侍郎平湖屠公勲應 詔薦之尋以  
父老迎養京師弘治十三年以達虜犯邊上攻援三四策當事  
者忌之出知徽州府招延郡士入學勸農佈種禁游惰奢僭條  
格井然十五年以守制去民不忍釋正德元年補真定府政務  
寬大不拘小節開廣學校作育人才公事之餘日進生徒講授  
不輟鄉有奄宦竊政或云當附之澤卽具一棺於堂後曰吾身  
豈附人者哉已准擬附諸棺矣卒無患三年陞浙江副使五年  
陞浙江叅政尋進河南按察使所在砥廉隅而氣槩稜厲各著  
聲績六年遼東缺巡撫遂遷都察院右僉都御史尋陞右副都  
御史巡撫保定地方未至任值流賊劉六等部下趙風子邢老



虎分兵勢猖獗入河南攻破虞永項城沈丘西華上蔡西平確  
山鞏葉夏邑商水舞陽武郟考厝城延津寶豐魯山泌陽息  
縣光裕等州縣皆望風奔潰殺戮守土官兵圍燒房屋劫掠金  
帛發燬墳墓屍骸受禍極慘時裕州同知郁采率義兵力戰弗  
支死之親藩及守臣具告急兵部建議復於宣府許太邵永  
大同李欽遼東劉暉延綏時源馮禎諸將部下續調未發官軍  
各若干分道赴之復以諸賊分責諸將計日剿滅而簡命澤與  
咸寧伯仇鉞提督河南軍務諸將分兵截殺大敗賊衆斬獲無  
算賊夜奔商水倉惶阻不能渡官軍若併力感之賊可殄滅因  
紀功御史雷宗力勸諸將朝崇府盤薄久之賊因得渡商水

破西華鄆陵郾城扶溝尉氏長葛洧川中牟新鄭鄆州滎陽滎澤等處至河南府賊逸我勞副總兵馮禎戰死賊亦敗去提督紀功鎮巡等官隱匿朝王誤事情實止以馮禎陣亡聞兵部劾之徵宗下獄賊自河南之敗徑奔汝寧澤與仇鉞分調諸將追勦斬獲甚多生擒賈勉兒楊寡婦乘勝追逐趙風子兄弟就擒劉三走死河南寇平捷聞上降勅獎勵以功陞右都御史尋加太子少保八年四川餘賊復起命澤同總兵時源總湖廣四川等處軍務出征先剿四川漢中劇賊廖麻子喻思俸次征內江駱松祥又次討崇慶州范藻九年寇平羣盜以功加太子太保兼左都御史回京值甘肅巡撫都御史趙鑑總制都御史鄧

璋以土魯番書聞且言逆虜所言不可允乞照先年差侍郎張海故事差官往經略 廷議推澤總督川陝等處軍務經略甘肅地方議曰番夷挾求賞幣不可與差官經略不可行請命彭澤徵調延寧人馬外迫番夷內逐達賊請勅都督奄克孛刺寫亦虎仙等共守哈密又勅赤斤等衛如遇番夷內侵併力扞禦御史張麒上言既有鄧璋總制不宜復令澤總督且澤貫陝西不宜差本貫公幹給事中王江上言治病者藥無二君奕棋者局無二帥不宜並用二人總督戎務俱忤旨不報澤抵甘州值土魯番火者他只丁寇赤斤苦峪諸處殺掠甚慘遣人來甘州遣書速送段來澤以番夷好利可以利啗遣使納幣二千銀

酒器一副贖取哈密城印十年三月奏事寧乞休不允會御史  
燕澄奏二人總戎務動相掣肘乞取澤回京委以重大之寄召  
澤歸掌院事未幾滿速兒渝盟犯肅州兵部尚書王瓊請劾切  
責勘究至十二年王瓊劾澤等欺罔乞令法司按實議罪會多  
官議戶部尚書石玠以爲大夫出使於外苟有利於國家專之  
可也今事須再勘王瓊曰納幣虜庭失信夷人致貽後患於國  
家利乎不利乎事已勘明更勘何事衆不能奪禮部尚書毛澄  
力救之罷爲民十六年御史楊秉中奏瓊害澤罷免乞起用從  
人望特起太子太保兵部尚書兼督團營嘉靖元年奏定武舉  
條格至今行之時原任四川巡撫胡世寧奏分守太監趙欽不

法澤覆如世寧奏因請罷鎮守諸內臣得 旨欽降奏御安置  
南京餘黨下吏分守仍推補澤又言近錄定策之功封拜恩蔭  
大濫乞體念內外諸臣辭免之誠切仍痛革錦衣衛所官員冒  
濫之積弊得 旨改命二年澤以科道交章劾其沮塞言路乞  
休 旨下卿所論關係國體非有阻塞言路其安心以副委任  
澤又言給事中章僑前劾尚書趙璜欲伸徐景嵩私怨僑自劾  
乞休且曰公論在天下楊之不能高抑之不能下澤所誣不足  
辨顧澤倡禁言之說得罪天下貽禍不淺 上曰言官論事期  
廷未嘗有禁澤亦未嘗有阻塞澤因再疏求去不允御史曹嘉  
言頃者僉事史道劾楊廷和嚴旨下之獄至廷和疏辨及彭澤

誣奏則溫旨慰獎諄諄數百言信容悅之臣塞敢言之路非  
聖世所宜有疏下所司御史朱寔昌言澤因道之奏又緣是爲都  
察之法以阻言路是因噎而廢食惡水之汎濫而欲障之也因  
論澤當一面之寄則有餘處本兵之地則不足南京科道彭汝  
寔等亦以爲言俱下所司澤言團營兵弱亟宜簡練乞改命大  
臣一人專其事其聽征兵宜命武定侯郭勛更番嚴練又宣大  
山西提督宜改總制易勅與之侍郎李鉞總制三邊勞績頗著  
久任則有成功天下兵備必慎選才者不當循資及徒用謹愿  
之士上命澤兼營務其宣大提督仍照原勅陝西事寧鉞取  
還朝餘悉如澤議行八月上命兵部授舍人蔣泰蔣清蔣鼎

俱錦衣千戶吳振武愛俱百戶澤上言泰等固皆戚屬但去年已封蔣輪伯爵蔭蔣珊蔣壽錦衣指揮今無故施恩泰等恐恩典太濫不可以示天下得報有旨九月以疾乞休上以澤老成練達方切重寄不允復屢疏乞致仕上曰卿先年總制勞績茂著起用以來清忠體國特允所請加少保寫勅獎諭命馳驛還月給米三石人夫四名歲時以禮存問卒謚襄毅

金獻民字舜舉四川成都府綿州人成化甲辰進士除行人司行人弘治四年擢浙江道監察御史明習法律嘗按雲南善處夷方事再按順天益著風采十一年陞山東副使爲天津兵備十五年守制十八年補湖廣副使正德二年陞湖廣按察使本

年謫爲民五年起貴州按察使本年守制七年補山東按察使  
八年陞都察院左僉都御史巡撫延綏等處地方本年回院管  
事九年陞都察院右副都御史十三年陞刑部左侍郎十五年  
陞南京刑部尚書十六年改都察院左都御史掌院事嘉靖二  
年遷刑部尚書本年改兵部尚書不妨部事兼督團營四年以  
哈密事往及還以原職致仕

李鉞河南祥符人弘治丙辰進士嘉靖四年任五年致仕卒贈  
太子太保謚康簡

王時中山東黃縣人弘治庚戌進士嘉靖五年任七年致仕後  
起原職調刑部尚書詳刑部



胡世寧字永清浙江杭州府仁和縣人誕有異表弱齡負巨人  
之度卓有經濟之志讀書不治章句惟慕古奇節偉行非常之  
功數夢與于肅愍議國事於朝家貧大布脫粟弗支卒歲落落  
自豪不以動其意也出贅昌化李氏因補昌化縣學生受知吳  
提學伯通有草中靈芝鳥中孤鳳之褒弘治五年壬子以書經  
舉鄉試第二例有司給道理費人百金世寧以浙右歲饑獨受  
五十金而行癸丑舉進士歸例得枋其門時須關謁鎮守中貴  
人世寧重折節棄之去八年授湖廣德安府推官時 岐王開  
國庶務方殷且羣從素驕世寧惟謹禮明法威以至誠曰此  
朝廷法卽 殿下家法某何敢縱此 朝廷民卽 殿下千百人

立國根本某何敢不恤衆由是憚其正而服其公及請民間開墾湖田充柴炭撫巡業與之公指畫利害娓娓乃止於獄之小大必以情幽滯輒從平反決縱民有包相之稱其清里甲均差役練民兵廣儲蓄諸條畫具可爲法十三年陞南京刑部陝西司主事抗厲法守帝城威福罕所撓紕西寧侯家訟久更九司十三道訟者老且貧矣比至一鞠卽得其情云法如是如是特聽訟者善避嫌不如我愚而直任也訟者感泣而決顧金箔者富翁也被誣羅織致大辟公亦務求真情辨雪之顧後每過門必稽顙而去其不爲威富所奪類此十四年應 詔陳邊務十事而士風國用武備將權尤切時病暇則延集同志 講求匡

濟之略十八年敘進山東司署貢外郎適武宗登極實授奉  
訓大夫復應詔陳六事勸學問慎輔導廣延納重守令公用  
人汰冗費探本達要議者善其大臣才具矣機戶顧謙侵官鉏  
累萬公力正其罪謙所解不能干逆瑾愬下南道阿奉者出之  
劾公爲枉牘上仍如其議調配阿奉者公以守正而免於禍  
焉正德二年丁卯進署陝西司郎中時劉瑯守備南京陝西司  
所轄八衛所武臣有犯至輒賂瑯判一狀來云問官有私卽  
無敢正法及公至知不可輕動絕無撓阻正德三年積三考出  
知廣西太平府郡陋甚屬吏桀黠難制至則推心撫之絕其饋  
獻踰月夷酋若思明黃文昌羅陽黃景明茗盈李萬榮全茗詳

榮高等欣服惟公所操縱惟太平知州李璿阻兵負固跳踉不  
已乃密檄龍英州趙元瑤捕之元瑤與疾力攻渠魁而縛散其  
積以紓乏固籍記治夷十事爲代者告黃文昌兄弟稔亂大將  
組征公協贊方略不費一矢掩捕成獄他如平羅陽之爭立定  
茗壘之疆土積惡頓息郡治三面逼江惟北無限因民欲建壺  
關堅厚閼峻費不及民至今賴之僅半載聞內艱去世稱治邊  
郡之良者必歸焉六年服闋補寶慶初朝 岷王聞 岷府受  
詞繫人取其財下諭里老奉有令旨必併其人送府驗實僞者  
弗貸以故府人相戒毋犯後王索民校急公曰初封校尉僉沙  
衡永保四府今歸寶慶一府他日分封繁衍其可支乎王曰御

史奏得旨矣公曰御史錯知府當奏改正王器其直無愠意值巨璫偕鎮守至郡縣集夫千且哀金餽之公咸罷之接以常禮鎮守王潤肆橫索公所以法潤斂手他日其從人以左道寓郡公執之恣射平民者又執之潤銜深而猶稱公好官云郡屬糧則繁漫奸不可詰公類田均糧而畫半徵之民省歲供之半閭境大呼曰太守免我糧矣七年陞江西副使兵備東鄉新縣舊賊巢也抄掠爲饒信惠公諭禁招捕威信明確擒賊怙亂樂庚二陳邦四輩奏免效順王賚一之死旣而遷縣築城經武賑饑民晏然安矣時爲語曰姚源之事三都堂處之而不足東鄉之事一兵備任之而有餘嘗調征姚源大盜王浩八提兵深入戰

於裴源山下一旬三捷及征建昌盜以衛益府征毛坊盜以  
援吳叅政延舉皆晨夜馳坑谷冒矢石爲士卒先功皆不錄惟  
會剿臨川盜預受恩獎又城廣昌城南豐城三邑賴之會宸  
濠志不軌誘受天下亡命爲奇邪計適其構害禁布政岳鵬世  
寧與鄭周旋且忿公論對峻直迫世寧出討賊世寧亦自是不  
至南昌他日憲司檄回賀濠生辰公曰是欲至我而制之也不  
往諸守巡亦不往已卯之變竟以是網衆公益見其幾云凡寧  
府人至撫營私殃民者輒裁以法食息憂慨謂拱默觀變尚稱  
按察臣戴面行耶忿發抗疏曰江西之禍不止盜賊可慮者省  
城失火延燒萬室基地所便盡歸王府債負所責遍及閭閻庄

田所逼民久立寨三司官員多受鈐束問刑叅吏舉奉成案買辦漸行於外府騷擾遍及於窮鄉良民不得安生羣起爲盜臣下恐有隱禍多懷二心禮樂政令漸不出自朝廷地方之事益有可慮又言寧王自討衛兵以來威勢日盛上下官司奉承太過乞推大臣兼任提督巡撫假權便宜悉聽計畫區處更乞戒諭寧王自治其國三司以下政務不須干與嚴戢下人恪守禁例凡王府發故事例必須奏准方許奉行庶幾地方無意外之患九重紆南顧之憂累千餘言事下兵部取旨移文寧府令自鈐束其下而已濠至涕泣自咎亦懼且悔矣自世寧厨廨門達皆置人然覘其廉正不可污乃摘前疏禮樂政令不

出朝廷諸語誣爲離間妖言誹謗奏逮之未下公已陞福建按察使離任矣臨發中食毒幾殆蓋濠爲之又嗾其黨巡浙御史潘鵬遣官挾濠卒誘執之世寧間行會逮繫詔獄刑訊踰年濠必欲殺之賄用事者抗章言應死者三願死屢矣言官交章論救用事者迫於公議得減死謫戍遼東瀋陽中衛十一年抵遼撫按禮遇之公不就館穀躬履行間講學授徒自業凡四載十四年六月濠反十五年始直世寧起戍中爲湖廣按察使十六年遷右僉都御史巡撫四川辛巳行且疏辭適世廟更化首批胡某以忠直擢用不准辭遂手疏勸上修德講學取大學衍義省覽以光聖德薦烈校何瑋邵銳堪講官林俊劉忠林



廷玉堪輔弼及言擒江彬擒宸濠均當論功附宸濠附江彬均當論罪武臣如指揮牟斌執法受罪內臣如周儀守正殺身宜一體褒錄無不讜切當 上心者蒞蜀甫兩月時松番背叛議處軍餉令近邊者輸租於邊而縮其額以所縮加內地而勿輸邊勞逸輕重均焉乃疏安撫方略要在用人才增兵將更賞罰足財用事下兵部議行 亡部隴氏請分設長官司兵備官議不可許公疏隴氏裂地設官雖稱衛彼實爲筠連等縣扼其襟喉從之便樞曹不用令隴壽襲職竟爲隴政所殺人服其識又劾退貪虐帥臣張傑大監趙欽蜀境大悅方討滅亂番節孝一族而代者至矣嘉靖元年晉吏部右侍郎未任奔父喪三年詔

議睿皇尊號廷臣強諍多被朴除名屬江淮薦饑公免喪家居上奏曰方今急務孝親爲大保民爲本乞早定追崇大禮肆赦羣臣小過使之各陳救荒弭亂保民之策而議行之以綿皇祖考萬世之祀則陛下萬世之孝也夫諫者心協忠誠質異強弱或斃雷霆之下終傷日月之明大爲天地生成之累臣願陛下謹其後也夫新進議禮一言適合未必其事事之皆是老成執禮一言過當未必其事事之皆非臣願陛下惟是之從無以新舊先存適莫於中繼復舉前古治亂關於戚宦宰執者以規警當時明盡懇直累千言不果上既有議遷顯陵於燕山者世寧乞嚴絕檢壬極論遷葬利害君臣協恭惟任賢保民爲

務并前疏並進 上畢覽深嘉之自是浸尋大用矣四年起兵  
部左侍郎公前謫遼東熟知東北一帶利病進備邊二十五策  
復憂時事進言保養 聖躬願慎重藥物獻三經講義大學泰  
誓好惡之章以戒媚嫉尚書惟辟作福之章以重威柄易大傳  
不出戶庭之章以慎幾事而好惡休戚禍亂特諄諄多中時忌  
悉留中餘一論廟制一諫傳陞官一會議於是言者劾世寧啓  
告密導妄殺之漸公引罪乞骸 上不許 大禮成與加條辭  
以在廷議禮臣時在家欲極言治道於後故僭言大禮於堯况  
屬論定之餘不敢冒又進知人官人二十事五年 命知武舉  
言者論列未已力求退改南京吏部左侍郎六年考察留都五

以下文臣去留多所鑒正五月拜南京工部尚書舊凡轉輸  
至者弗獲時納有候至數年者乃使謂內監曰如更阻難當別  
處耳蓋欲奏徑輸京師也不數日納竟者五十餘輩又福建解  
至料銀幾二萬皆赦前已徵者所司以時價不酬欲令加徵乃  
疏各省未輸者盡行蠲免而解至者反加徵情理豈堪得請直  
輸其銀於京免重困焉七月以左都御史召過沛疏治河事宜  
及瀕河夫役之苦道改刑部尚書尋用詹事霍韜言加太子少  
保左都御史掌院事公振舉憲度釐正敝習首疏勸上當涵  
養此心使寂然在中無所偏倚遇事當喜怒者則又臨時省察  
其中節與否而後發之至論聽言用人言殊剴切上嘉之務

持大體以近年刑獄未清乃裁上畫六之法申明職掌凡十條  
最後論執法被誣奪職者復其官制辭褒美俾中外遵行而  
考察奪職者始許大臣言官論辨矣執政請禁私謁公言臣官  
以察爲名人非接其貌聽其言無由知其心識其才若屏絕過  
從徒采浮言按考語而求激揚之當難矣上是之不禁世寧  
之再召執政有力焉終不與黨久募更刑部尚書公於重辟擬  
罪研究情法必允雖奏當論定者不避嫌謗執議懇惻弗但已  
上嘗感悟納用大監剛聰與運舟爭道誣漕運官兵奪其織造費  
幾貽二千人乃疏不宜廣追牽連以起驚惑之心上止是其言  
竟從寬決至秋聰家僮訐聰自私誣衆之罪將逮下聰獄抵法

而公言益信時遣官分錄天下罪囚事竣公悉審別當否品其勤惰而効其縱者其因事建明得著爲令者三親屬犯姦者減死一也竊盜自首得減者免刺二也庶人在官應守法而不守者並以枉法科贓三也陳九疇者故以兵備巡撫有事甘肅兩敗土魯番兵於時彭澤總制楊廷和秉政土魯番因再失利縱反間傾九疇當事者有憾於楊彭二公欲連坐之噉儉人王邦奇輩能遷謂哈密淪陷番達寇暴釁起九疇於是下九疇獄擬大辟公昌言於朝曰世寧司刑而殺忠臣寧先殺世寧執政持不可乃奏述西事詳辨九疇之冤明其決不然上大悟曰豈我巡撫都御史殺來償回于命耶九疇由是貸死戍邊廷和澤

免于逮七年春世寧疾作乞骸 命公子純入監讀書是慰留  
也時奏河清甘露降方告謝齋宿忽風霾異常世寧求黜應變  
不聽則上勤學恤民任官十事轉兵部尚書加太子太保世寧  
辭言甘肅之危可慮中原兵將錢穀無備可慮臣弱才恐負重  
狂再辭不許則陳兵政十事曰定武略崇憲職重將權增武備  
更賞罰御土夷足邊儲絕弊源正謬誤惜人才以取進止上  
許世寧就職次第議之世寧乃拜命大臣建議銷兵世寧證古  
籌今辨其非是議遂格已而土魯番合瓦刺入寇我師敗之夷  
復請釋舊羈番使下兵部計宜者世寧言番夷變詐反覆邊臣  
奏報牴牾再舉陳九疇禦虜始末備述 先朝馭夷故實以及

今日圖復哈密利害審究情勢樹久安之宜柄要喜功者中沮  
之尚書王項王道泰復哈密爲任八年春世寧申論增武備足  
邊儲用人才三事薦馬昊陳九疇施儒楊必進才堪統軍禦敵  
選曹悲世寧侵官格不用世寧亟辭疾不許特暫免其朝叅世  
寧又極言任人圖治今日當務以自盡始終之義然時益多忤  
世寧難久容祈請彌懇上慰諭不從疏三上乃許致仕驛歸  
廩役備給如典世寧歸三月復以南京兵部尚書叅贊機務召  
世寧再辭疾篤猶力贊上圖廣嗣續容受直言愛惜人才云  
九年秋九月丙辰卒於家壽六十三天子聞訃輟朝贈少保  
謚端敏詔省臣諭祭勅有司治塋事公幼嘗學武精騎射正



德庚午服闋赴京至滄州遇大夥賊刼掠焚殺勢甚猖獗前途孔棘乃避入城中州守張琦漫不爲意公激以忠義授以方略協力捍禦憑城對敵奮不顧身賊不敢近數日城賴以全公之力也

典故紀聞曰嘉靖時都察院左都御史胡世寧上言書曰詞尚體要律曰陳言事理並要直言簡易不許虛飾煩文弘治以前臣僚章奏皆刪煩就簡故君上得以親覽無遺及武宗時不親政事臣下遂因循自逸不事刪削惟聽吏胥全具文移或一事而重言或一本而數紙雖臣等竟日有不能周讀一過者乃以止勞君父爲治之體豈宜如是乞申勅內外諸司凡事當奏

題者務照弘治以前舊規刪煩就簡而部院議覆者亦必撮要語使無贅詞又無失事庶幾少便省覽增世廟善其言令諸司章奏不許煩詞庶易省閱

鄭端簡曰公朴忠直諒氣壯才雄淡泊寧靜清素不滯席文襲稱公論事如結舌草奏如懸河邵康僖曰胡公疾惡如讐善則猶已余兩爲公屬吏手書勉余忠孝大節公議哈密與南海不合論芒部功王浚川以爲發其過大不喜薦賢才安仁以爲侵官相壓亂政發怒訴於朝河西之議語侵永嘉彭澤陳九疇得免奇禍昌化嗣伯下廷議公言吾輩不得以厚賂故誣朝廷安仁變色大沮以故諸大臣皆思公論大禮是永嘉安仁說竟不

肯相依附賴

上明聖憐其忠鯁始終眷注云

增

李承勛字立卿湖廣武昌府嘉魚縣人自幼英邁家食時以經  
濟自負不與婁儒比弘治癸丑進士授直隸安慶府太湖縣知  
縣縣俗故囂訕至則招集父老示以禮義於強梗者治之不少  
假借以其餘力修舉學校考德問業親督勸之又砥身廉介省  
費薄徭流亡悉集民多碑識然勁氣孤峭人多忌之久之補南  
涼州部山東司主事歷山西司員外郎廣西司郎中益明習法  
律多所平反有奸法當坐者雖勢豪不輒撓每日散衙無事與  
胡公世寧魏公校余公祐以道義相切劘尤究極典故并中外  
條例興革邊圉強弱事幾得失一一籌算以自考鏡時稱爲四

君子會以憂去及服闋仍補南京工部虞衡司郎中未幾陞江  
西南昌府知府南昌難治劇賊驕藩內外孔棘勛深略雄才迎  
機輒應正德六年贛賊犯新淦執叅政趙士賢靖安賊據越王  
嶺瑪瑙岸華林賊破瑞州勛廣伺謀繕壁壘扼溪澗進戰擒胡  
雪二纔還府華林賊又叛殺副使周憲乃諭降建賊王奇約內  
應夜引兵舉火爲號大破賊斬首三千境內安輯卽上疏請蠲  
租八年姚源賊起江浙間執兵備吳廷舉總制俞諫請邊兵勛  
賊勛曰賊乏食必掠裴源就積粟請贛兵自德興南昌兵自高  
源分兩翼伏裴源而令邊兵驅賊賊果走裴源大敗遞去太監  
黎安欲奪其功誣勛竄賊嗣大理卿燕忠卽訊廣信事白九年

陞浙江按察使事事持大體不理米鹽微事凡貪墨吏雖親故  
不曲庇或本廢吏而爲毀者所中傷則力爲伸雪之憲紀肅然  
人不敢犯丙子進陝西右布政使敦本實率以儉約嘗掌藩事  
力專才膽一時弊政釐革殆盡下和買之令禁無名之役人至  
手今稱之十四年轉河南左布政使十五年陞都察院右副都  
御史巡撫遼東遼東故富饒無虜患自汪直開邊虜輒攜二援  
我開原懿路洸河三城極殘破乃修築定遠慶雲古城鎮夷松  
山紫河六堡墩望百八十一所屯田千五百頃又修中固鐵嶺  
又蒲河撫順諸城皆濬隍樹木爲阻固東園稍寧進俸一等嘉  
靖二年養病四年起南臺五年轉南京刑部侍郎進尚書六年

召入吏部會新進用事從中沮尼道改刑部加太子少保上疏  
論時事本年十二月改兵部尚書兼都御史代胡端敏公提督  
團營加太子少保惠郭勲驕縱剪其羽翼懇入欲併中端敏公  
遂辭營務不允八年改尚書兵部當是時田州岑猛叛用兵兩  
廣騷動芒部沙保又叛土魯番奪我哈密搖河西小王子歲入  
塞勲與端敏相繼本兵同心經理戎事頗戢又奏裁各省鎮守  
守備內臣二十七人錦衣官校旗勇內府詭匠數千人此皆破  
祖宗法依城社坐耗國儲股民膏血大蠹衆束手閉目莫敢何問  
者勲侍 上聖明一旦剪剔去嘉靖九年大風晝晦 上恐懼  
憂詔問勲答曰聖祖有訓謹避胡戎去歲米谷北虜盡入河套

以故陝西邊患延寧固原爲急甘肅軍餉專仰河東宜於蘭州  
及時糴貯以備河西災窘曩時河西患苦土魯番今亦小棘又  
深入兩寇騷擾孤危益甚海賊套賊出入殺掠並經莊浪被其  
殘害急宜繕塞設險斷臂絕踵使相隔絕兀良哈最近京師不  
善撫卽爲門庭之寇雲南安鳳之叛軍民困敝臨安蒙自盜賊  
復起曠日持久恐釀成大患交趾世子流寓老撾異日歸命請  
授或據地求封皆未可測惟用人理財早爲籌備以保社稷幸  
甚又騰驤四衛者詭冒依附奸欺不可詰上言官府一體請官  
軍考選清覈並如旗手等衛制曰可太監麥福言四衛禁軍隸  
兵部不便往歲彰義門破虜東市勦曹賊皆四衛功以直內故

得號召易集下兵部再議飭執言往歲之事正以兵權歸閣致  
亂彰義門之戰由太監王振東市之賊卽大監曹吉祥諸閹語  
塞竟從其議十年致仕卒贈少保謚康惠



國朝列卿紀卷之四十八終